



Breiðdalshreppur og Fjarðabyggð

Kynningarbæklingur

Ávarp frá samstarfsnefnd sveitarfélaganna

Laugardaginn 24. mars 2018 verður kosið um sameiningu Breiðdalshrepps og Fjarðabyggðar. Ef í báðum sveitarfélögum reynast fleiri kjósendur fylgjandi sameiningu en andvígir telst hún samþykkt og tekur hún þá gildi 10. júní 2018.

Í ársbyrjun 2017 bjuggu í Fjarðabyggð 4.691 íbúar, en í Breiðdalshreppi 182. Að landstærð er Fjarðabyggð 1.163 km², en Breiðdalshreppur er 452 km². Samanlagt eru þessi sveitarfélög því 1.615 km² og yrðu einungis 20 sveitarfélög á Íslandi stærri að flatarmáli, kæmi til sameiningar. Nýtt sveitarfélag yrði í 10. sæti yfir fjölmennustu sveitarfélögin.

Samgöngur eru ágætar á milli byggðarlaganna. Í öllum þéttbýliskjörnum í Fjarðabyggð er sjávarútvegur veigamikil atvinnugrein og hið sama gildir um Breiðdalshrepp. Hefð er fyrir öflugum landbúnaði í Breiðdal og sú atvinnugrein vegur þyngra þar en í nokkru byggðarlagi Fjarðabyggðar. Ennfremur er ferðaþjónusta öflug í báðum sveitarfélögum og í raun er hún ein af þýðingarmestu atvinnugreinum í Breiðdalshreppi. Auk þess eru vonir bundnar við þann kraft og áræðni, sem stofnun nýrra fyrirtækja í byggðarlaginu ber vott um.

Í byggðalögum Fjarðabyggðar er að finna skólastofnanir, heilsugæslu, ýmsa menningar- og félagsstarfsemi, hafna- og þjónustustarfsemi o.m.fl., sem gerir sveitarfélagið aðlaðandi til búsetu. Allt þetta á einnig við um Breiðdalshrepp.

Samstarfsnefnd á vegum sveitarfélaganna hefur undanfarið undirbúið tillögu að sameiningu, safnað upplýsingum og byggt upp áætlanir sem fela í sér hvað gerast muni, verði sameining samþykkt. Nefndin er sammála um að það feli í sér augljósa kosti fyrir svæðið í heild, ef af sameiningu verður. Eins og fram kemur í kynningarefni er ljóst að umtalsverðir opinberir fjármunir myndu fylgja í kjölfarið, bæði til niðurgreiðslu skulda beggja sveitarfélaganna og uppbyggingar innviða í Breiðdalshreppi. Það er því skýrt álit nefndarinnar, að sameiningu muni fylgja öflugt sveitarfélag, sem verði vel í stakk búið að veita góða þjónustu til lengri tíma lítið, öllum búum þess til góða.

Sveitarstjórnir beggja sveitarfélaga hafa fjallað um álit nefndarinnar, án atkvæðagreiðslu í samræmi við ákvæði sveitarstjórnarlaga. Í nefndinni sátu 4 fulltrúar frá hvoru sveitarfélagi. Bent er á ítarlegri samantekt frá nefndinni, en þá sem birtist í bæklingi þessum. Hana verður hægt að nálgast á heimasíðum beggja sveitarfélaganna; www.breiddalur.is / www.fjardabyggd.is

Hlutaðeigandi eru hér með hvattir til að kynna sér málið.
F.h. samstarfsnefndarinnar; Jón Björn Hákonarson, Hákon Hansson.



Jöfnunarsjóður, ársreikningar og lykiltölur

Verði af sameiningu Breiðdalshrepps og Fjarðabyggðar mun framlag Jöfnunarsjóðs sveitarfélaga verða umtalsvert á sameiningarári og næstu 4 ár þar á eftir, eða sem hér segir:

Heiti framlags:	Vegna Breiðdalshrepps	Vegna Fjarðabyggðar	Samtals krónur
Skuldajöfnun	24.000.000.-	450.000.000.-	474.000.000.-
brúun og endurskipulagning			157.000.000.-
Skert tekju- og útgjaldajöfnun			50.000.000.-
		Samtals kr.:	681.000.000.-
Auk þess greiðsla vegna útlagðs kostnaðar, allt að kr.			17.000.000.-

Ársreikningar sveitarfélagana fyrir árið 2017 liggja ekki enn fyrir og hér á eftir eru því birtar ýmsar lykiltölur úr ársreikningum þeirra, bæði A- og B-hluta fyrir árið 2016.

Samant. (A- og B- hluti) kr./íbúa	Breiðdalshr.	Fjarðabyggð	Mism. (B – F)
Tekjur	1.197.940	1.323.702	125.762
Laun, launatengd gjöld og lífeyrissj.	604.654	668.858	64.204
Önnur rekstrargjöld og afskriftir	404.286	520.394	116.108
Fjármagnsliðir	-65.907	-57.682	8.225
Óreglulegir liðir	0	3.858	3.858
Rekstrarniðurstaða 2016	123.093	80.627	-42.466

Kjörseðilinn

Spurningin á atkvæðaseðlinum þann 24. mars verður einföld:

Ert þú samþykkt / samþykkur sameiningu Breiðdalshrepps og Fjarðabyggðar? Já Nei

Sameining – hvað svo?

Samstarfsnefndin hefur unnið eftirfarandi samantekt til að auðvelda íbúum að taka afstöðu í atkvæðagreiðslunni. Er hún aðgengileg í heild á heimasíðum sveitarfélaganna.

Áhrif sameiningar sveitarfélaganna

Verði sameiningartillaga samþykkt mun hið sameinaða sveitarfélag taka yfir allt það land sem nú tilheyrir aðurgreindum sveitarfélögum og íbúar beggja sveitarfélaga verða þar með íbúar hins sameinaða sveitarfélags. Eignir, skuldir, réttindi og skyldur sem tilheyra sveitarfélögunum falla til hins sameinaða sveitarfélags. Skjöl og bókhaldsgögn beggja sveitarfélaga verða afhent hinu sameinaða sveitarfélagi til varðveislu.

Núgildandi samþykkt um stjórn Fjarðabyggðar og fundarsköp bæjarstjórnar verður lögð til grundvallar fyrir hið sameinaða sveitarfélag, ásamt skipuriti og stjórnunarfyrirkomulagi þar til það hefur sett sér nýja samþykkt.

Hið sama gildir um aðrar reglur og samþykktir Fjarðabyggðar eftir því sem við á.

Hið sameinaða sveitarfélag mun bera heitið Fjarðabyggð og verður heimilisfang þess óbreytt.

Kosið verður til sveitarstjórnar hins sameinaða sveitarfélags laugardaginn 26. maí 2018, sbr. ákvæði laga um kosningar til sveitarstjórna nr. 5/1998.

Nokkur lykilatriði í málefnasamningi samstarfsnefndar

Hér á eftir koma nokkur atriði, er varða einkum íbúa Breiðdalshrepps og eðlilegt er að þeir velti fyrir sér, áður en afstaða yrði tekin í kosningunni.

Dagvist aldraðra: Verður rekin með óbreyttu sniði.

Leikskóli verður áfram á Breiðdalsvík. Hið sama gildir um tónlistarnám.

Grunnskóli: Gert er ráð fyrir því að sameina stjórnun grunn- og leikskóla á Stöðvarfirði og Breiðdalsvík undir eina skólastjórn. Leikskólastarf á Breiðdalsvík verður flutt í grunnskólahúsnæðið á Breiðdalsvík. Gert er ráð fyrir kennslu í grunnskólunum á Breiðdalsvík og Stöðvarfirði. Nánari útfærsla á samkennslu verði rædd og útfærð í samráði við foreldra, forráðamenn og fagaðila með það að markmiði að efla faglega og félagslega stöðu nemenda.

Sundlaug og íþróttahús verða rekin áfram á Breiðdalsvík með svipuðu sniði og verið hefur.

Slökkvistöð verður áfram á Breiðdalsvík og þar mannað slökkvilið, sem yrði hluti af slökkviliði Fjarðabyggðar og félli undir stjórn þess.

Þátttaka Breiðdalshrepps í verkefninu **Brothættar byggðir** mun halda áfram eins lengi og samningur kveður á um. Aðilar gera sér grein fyrir sérstöðu Breiðdals sem landbúnaðarhéraðs. Landbúnaðarmálum mun verða sinnt á sambærilegan hátt í öllum byggðarlögunum.

Skrifstofa á Breiðdalsvík verður til staðar til ársloka 2018, en síðan verður öll almenn þjónusta bæjarskrifstofu veitt í þjónustugátt á bókasafninu þar eins og í hinum byggðarlögunum..

Áhaldahúss- og hafnarstarfssemi verður áfram á Breiðdalsvík en samstarf milli þeirra aukið.

Samhliða ofangreindu fyrirkomulagi verður unnið með þátttöku íbúa í ákvarðanatöku. Samstarfsnefndin telur í því sambandi áhugavert að útfæra hugmynd um að ráðstafa ákveðinni fjárhæð árlega til samfélagslegra verkefna í hverju byggðarlagi fyrir sig.

Ennfremur er samstarfsnefndin sammála um að setja fram skýra framtíðarsýn um fyrirkomulag ýmissa mála, sem tryggja myndu að nýtt sameinað sveitarfélag yrði í fremstu röð sveitarfélaga á Íslandi til lengri tíma lítið.


Má þar nefna eftirtalin atriði:

1. Rafræn stjórnsýsla. Samið verður við ríkisvaldið um að próa þessa hugmynd í samvinnu sem tilraunaverkefni.
2. Samgöngumál, sbr. almenningssamgöngur.
3. Efling sóknarfæra í atvinnumálum.

Varðandi liði 2 og 3 er stefnt að því að efla félagslega þátttöku íbúanna og sameiginlegan vinnumarkað. Í því sambandi yrði Fjarðabyggð tilraunasveitarfélag þar sem veitt yrði fjármagni til verkefna til allt að 5 ára, þá yrðu almenningssamgöngur skipulagðar með það að markmiði að bæta aðgengi að sameiginlegum vinnumarkaði sem og félagsstarfi þ.m.t. íþróttastöðu.

4. Efling sóknarfæra í ferða- og menningarmálum. Unnið verður með sérstöðu svæða.





Sérstaða Breiðdals:

Breiðdalur er þekktur fyrir náttúrufegurð. Þar eru framatvinnugreinar enn þá stundaðar, bæði öflugur landbúnaður og hafnsækin starfsemi vegna nálægðar við gjöful fiskimið.

Rík áhersla er lögð á þátt menningar, vísinda og ferðaþjónustu. Má í því sambandi nefna jarðfræði svæðisins, en þar eru menning og vísindi nýir vaxtarbroddar. Hið sama gildir um þátt sögu, málvísinda og menningartengdar ferðaþjónustu.

Sérstaða Fjarðabyggðar:

Fjarðabyggð er fjölkjarna samfélag með fjölbreytta atvinnustarfsemi þar sem fjölskyldan er í fyrirrúmi. Sérstaða hvers byggðakjarna hefur fengið að njóta sín.

Samfélagið byggir á fjölbreyttri menningu, öflugri æskulýðsstarfi, einstakri náttúru og góðu mannlífi.

Atvinnu sækja íbúar þvert um allt sveitarfélagið með fjölgun atvinnutækifæra og bættum samgöngum.

Kynningarfundir

Kynningarfundir vegna sameiningarkosninga verða haldnir í öllum þéttbýliskjörnum byggðarlaganna tveggja. Verða þeir auglýstir á heimasíðum sveitarfélaganna og í Dagskránni, þegar nær dregur.

Skorað er á íbúana að koma á fund í sinni heimabyggð og kynna sér sameiningarmálin.

Samstarfsnefnd um sameiningu Breiðdalshrepps og Fjarðabyggðar